


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-97	Al-Qadr	5	1	Makkiyyah	Ke-25	2



Zaman Diturunkan

Surah al-Qadr diturunkan pada permulaan kehidupan Rasulullah s.a.w. di Mekah di antara tahun 1 hingga 3 Kenabian, pada ketika itu da'wah kepada Islam masih lagi dilakukan secara sulit dan rahsia. Kebanyakan surah-surah yang diturunkan kepada Rasulullah di peringkat itu mempunyai nilai kesusasteraan yang sangat tinggi, ringkas, kemas dan padat.

Perkaitan Surah Al-Qadr Dengan Surah Sebelum Dan Selepasnya

1. Di permulaan Surah al-'Alaq sebelum ini terdapat wahyu yang mula-mula diterima oleh Rasulullah, Surah al-Qadr ini pula menceritakan tentang malam pertama Rasulullah s.a.w. menerima wahyu daripada Allah, itulah Malam Al-Qadr.
2. Di dalam Surah al-Bayyinah akan datang, tersebut tujuan dan matlamat al-Qur'an diturunkan. Dengan turunnya al-Qur'an sempurnalah hujjah Allah kepada kedua-dua cabang keluarga Nabi Ibrahim a.s. dari kalangan Bani Israil (Ahli Kitab) dan juga Bani Isma'il yang terdiri daripada orang-orang musyrikin Mekah. Dengan menerima Islam, mereka boleh termasuk dalam golongan خَيْرُ الْبَرِيَّةِ (sebaik-baik makhluk), dengan menolak Islam pula mereka akan menjadi شَرُّ الْبَرِيَّةِ (seburuk-buruk makhluk).

Beberapa Kata Kunci Dan Tema Utama Surah

1. Rasulullah s.a.w. mengarahkan supaya malam yang penuh berkat (ليلة القدر) itu dicari pada malam-malam ganjil di 10 akhir bulan Ramadhan. تَحَرَّوْا لَيْلَةَ الْقَدْرِ فِي الْوَيْتْرِ مِنَ الْعَشْرِ الْأَوَاخِرِ مِنْ رَمَضَانَ Bermaksud: "Carilah malam Qadr pada malam ganjil daripada 10 akhir bulan Ramadhan". Riwayat Shahih Bukhari, hadits 1,913 daripada 'Aisyah.
2. Penurunan al-Qur'an merupakan keputusan yang cukup hebat daripada Allah, ia adalah keputusan yang boleh mengubah taqdir bangsa-bangsa dan mengubah nasib manusia.
3. Keselamatan manusia hingga ke hari kiamat terletak pada kitab al-Qur'an yang merupakan kitab terakhir daripada Allah, ia hendaklah dijadikan sebagai panduan dan pedoman hidup.